

FRIÛL E TRIEST

Za un pâr di agns, in chê volte che Vignesie e clamave jutori cuintri dal Friûl ch'al voleve gjavâsi des sôs dependencis e fâ une regjon di bessôl, i furlans - gjavant Pordenon - a àn fate une ridade. E se cualchidun al ves ancjemò cualchi scrupul di cussience par vê voltadis lis spalis ae Serenissime, al varès di bastâ il truc dal Proveditorât des Oparis Publichis capitât chescj dîs, par fâi meti il cûr in pês. Dopo che, il mont al è mont, il pes grant al mangje il pes piçul.

Ma tes ultimis polemichis cuintri il progjet di Statût Regjonâl imbastît par opare de Cunsulte, al è stât dit che prime di meti adun Statûts si à di spietâ che Triest al vegni tornât a l'Italie, e in chê volte al sarâ Triest - capitâl de Regjon - ch'al pensarâ a proponi l'ordenament autonomistic pal Friûl e la Vignesie Julie. E cheste cjacarade e je stade fate di cualchi furlan di chei che si jerin simpri mostrâts contraris a restâ sot di Vignesie. Al vignarès a jessi: sot di Vignesie no, ma sot di Triest sì. Cui sa parcè mo? Triest nol pò nancje rimpinâsi su pai stocs de tradizion storiche, che Vignesie e cirive di tirâ in bal: fintremai za trente agns par lâ a Triest nus coventave il pas come par lâ a Viene o a Londre.

Se il distîl dal Friûl al à di restâ leât cun chel di Triest, o sin dal gjat. Parcè che la cuistion di Triest sepi Diu cuant che podarà jessi disgherdeade. Lis promessis fatis la vilie des votazions ducj si sa ce che a valin. E in chest moment, s'è je vere che Tito al fâs bieles muse ai Angloamericans, si pò nome crodi se chei a pensin a fâi dispiets. Intant i Triestins a stan di gale come che e a son: a sberghelin a fuart "Trieste all'Italia" e po' a zontin plui planc: "... il più tardi possibile!". O'ndi vin sintûts: plui di cualchidun.

Dal rest, chê di Triest e je une situazion speciâl, che no à nissun cefâ cu la nestre. Pai tre grancj puarts di mâr, Triest, Flum e Pole la "redenzion" e je stade une scopule mortâl, che ju à mandâts a remengo. L'Italie no à bisugne di puarts e je plene ator ator. I trê puarts dal Adriatic orientâl no àn e no puedin vê un interland talian che ur dedi di vore. In chescj trente agns, Triest al à costât al guviar talian un voli dal cjâf, par no lassâlu murî di fan. Pole e je diventade un argagn rusin; e Flum al jere stât salvât cul cedi o fitâ il puart ae Jugoslavia, che almancul i dave lavôr.

Cumò Triest, s'al vûl vivi cu lis sôs risorsis, ancje tornant sot de sovranitât taliane, bisugne ch'al vebi la pussibilitât di inviâ liberamentri il so trafic cui Stâts da l'Europe centrâl, di tratâ cun lôr e di lavorâ par lôr. Independent o sot di altris, la sô pusizion e je, pôc sù pôc jù, chê des antighis citâts anseaticis; e la sô vite e pò vignî garantide nome sul plan internazionâl. E prime che lis nazions interessadis a rivin a une intese definitive sul cont di Triest, al è ce spietâ. Cussì se la siorte de Furlanie e à di dipindi dal distîl di Triest, no je par noaltris nissune sperance di metisi a puest. Cui ch'al ven fûr

cun chestis propuestis al pò jessi nome un antiregjonalist, un devot dal manarin, un furlan ch'al merte di lâ ator cuntune crôs segnade cul zes su pe schene, par che ducj a sepin ce ch'al è.

(Patrie dal Friûl - 1948)